

四庫全書

集部

欽定四庫全書

集部

文苑英華卷六百五十三至五

詳校官給事中_臣李臺

助教_臣常循覆勘

總校官進士_臣朱鈐

校對官中書_臣王瑣

謄錄監生_臣徐步青

欽定四庫全書

文苑英華卷六百五十三

宋 李昉等 編

謝官

謝竇相公除男襄州叅軍仍許隨父啟一首

謝周相公啟一首
謝魏相公啟一首

謝宗卿啟一首
謝襄州李尚書啟一首

謝紇于相公啟一首
謝時相啟二首

謝集賢相公啟一首
謝奉常僕射啟二首

謝尚書丞郎給舍啟一首

謝史館裴相公啟一首 謝監脩相公啟二首

謝宰相啟一首 謝諸知己啟三首

謝竇相公除男襄州叅軍仍許隨父啟

呂頌

某啟男元曜蒙恩授襄州叅軍又奉七月初四日勅許令隨父準例支給料錢者恩生不次事出非常仰戴天慈伏荷仁德以欣以懼戰越交并伏以國朝故事及古

名臣惠及黎元勲高社稷則有賞延于代祿及于家或
總角腰章或垂髻結綬綺紈拜命襁褓分榮自葉流根蓋
超彞典某謬承聖獎猥守方隅政教無聞典禮多闕男
尚幼小濫廁班榮相公念以遐荒將與便近更許隨父
仍給料錢榮超流輩之中賞過彞章之外退循涯分喜
躍伏深限以所守拜謝末由下情伏增戰灼

謝周相公啟

杜牧

某啟伏奉八月三日

集作三月八日

勅除尚書司勳員外郎史

館脩撰承命榮懼啟處無地伏以聖主順上帝之則率
四海以仁神化風行家至日見古先哲王之德也有求
必至有開必先是以傅呂得於夢卜申甫降於山岳伏
惟相公待主乃用為時而生當考室構厦之時膺督繩
削墨之任贊傑俊遂賢良調陰陽提紀律類能而使度
材授官常切如家之憂每懷撻市之耻是以朝廷禮樂
天下清明人不凋傷神不怨悵萬物由道百度皆貞雖
周獲仁人商得元哲夢卜降岳之得豈能逾焉某以樸

楸之材糞朽之賤遭逢聖

集作威

業三帶郡符自審事宜

實以逾忝伏以睦州治所在萬山之中終日昏氛浸

集作

侵

染衰病自量忝官已過不敢率然請告唯念滿歲得

保生還不意相公拔自汙塗

集作泥

昇於霄漢却收斥錮

令廁班行仍授名曹帖以重職當受震駭神魂飛揚撫

已自驚喜過成泣藥肉白骨香返遊魂言於重恩無以

過此雖買臣懷紱郡郎蕭育召拜扶風楊僕三組垂腰

蘇秦六印在手較於榮忝無以為踰

集作喻

言念微生難

酬殊造伏以相公自數年以來朝廷舊老四海賢俊皆
因提挈集作學盡在門館毗輔聖主魏為元勳自有神明
以相百祿顧惟賤末報効無門感激血誠涕淚迸溢無
任攀戀激切懇款之至謹啟

謝座主魏相公啟

為弟作

李商隱

義叟啟伏奉前月二十八日勅旨授秘書省校書郎知
宗正表疏續奉今日五日勅改換集作授河南府叅軍依

前充職者小宗伯之取士早辱搜揚大宗正之薦賢又

蒙抽擢未淹旬日再授班資任重本枝職齊載筆方殊
王逸唯注於楚詞有異郝隆但攻於蠻語此皆相公事
均卵翼勢借風雲特於汨沒之中俯借扶搖之便孔龜
効印未議於酬恩楊雀銜環徒聞於報惠感怍之至罔
知所裁謹啟

謝宗卿啟

為弟
作

義叟啟伏奉

集作
蒙

奏署知表疏官伏奉前月二十八日

勅旨授秘書省校書郎續奉今日五日勅改授河南府

參軍者某少實艱屯長無才術

集作運

徒以與周同姓從

魯諸儒託阮籍之竹林攀郗詵之桂樹曲蒙題目猥被
薦聞惟我大朝克崇宗祏敘文昭武穆之位敦紹堯績
禹之親豈以斯文失於能者况一蒙旌錄再忝恩榮班
資將廁於郗超職業幾踰於孫楚感結所至生死以之
即以今月某日發赴所職登門在近縮地是思惟勤肺
肝恨無毛羽伏惟時賜恩察謹啟

謝襄州李尚書啟

溫庭筠

某啟某樑社几材蕪鄉散質殊無績效堪奉恩明曷當
紫極牽裾丹墀載筆顧循虛淺實過津涯豈知畫舸方
遊俄昇於桂苑蘭扁未染已捧於芝泥此皆寵自昇堂
榮因著錄勵鴻毛之眇質託羊角之高風日用無窮常
仰生成之德時來有自寧知進取之規兢惕彷徨莫知
所喻末由陳謝攀戀空深

謝紇干相公啟

某啟某材謝梗柵文非綺組間闕千里僅為蠻國叅軍

荏苒百齡甘作荊州從事寧思羽翼可勵風雲豈知持

彼庸踈栖于宥密廻顧而漸離緇

集作
淄非

垢冥升而欲近

煙霄榮非始圖事過初願此皆揚芳甄藻發跡門墻丘
門用賦之年相如入室楚國命官之日宋玉登臺一日
光陰百生輝映末由陳謝伏用兢惶

謝時相啟

張玄晏

某啟某今日伏奉宣召伏蒙聖慈令充職翰林者出自
埏鎔成茲忝越循涯積感揣分增榮某洛下諸生隆中

散族進取本無其聲援歸休復迫於羈離白首為郎固
乏堂堂之稱青雲無路但甘碌碌之嗤愈迫低徊欲成
淪沒相公殊常降德不次施恩拔自迷途寘諸密地蒙
虎皮於下駟抑以騰驥絳鷁羽於寒鷗教之騫翥遂使
專詔誥教令之事為言語侍從之臣內省孱微益深榮
懼謹啟

二

某啟某伏奉今日勅授尚書駕部郎中知制誥依前充

職者某才殊敏健識異精通既無環潤之姿焉有矜嚴
之譽謬因鎔鑄驟陟煙霄掌禁苑之文詞列金門之侍
從顧惟鯁淺尋過津涯忽自秋而徂冬每素飡而尸祿
愈成醜冒益被顯榮相公曲示洪鈞重磨頑璞降始終
之茂德弘特達之深恩再假丹青復掀羽翼遂使移粉
署應星之列玷掖垣掌誥之名盡出殊私皆為華給蚊
蚋難勝於山岳壑仄何報於生成謹啟

謝集賢相公啟

某啟某今日伏奉恩旨宣召充職翰林者出鈞鎔之巨
力收居楔之小材拔自塵泥驟陞霄漢撫已實知其忝
越銜恩載切於屏營某洛下諸生朝中孤宦進取本無
其聲援歸休又迫於羈離既碌碌以經時亦偃偃而度
日伏蒙相公十九兄殊常降德不次施恩生暖甲於枯
荻化豐肌於朽骨出諸陷穽置在門闈綽鵠羽於寒鴟
教之騫翥蒙虎皮於下駟抑以騰驤但自捫心何階報
德况專詔誥教令之事為言語侍從之臣內顧孱微益

深榮懼唯冀永賚肝膈長託鑪錘但當有命以酬固亦
無言可謝謹啟

謝奉常僕射啟

某啟某今日伏奉聖旨令充職翰林者龐鴻恩重螻蟻
命微循涯增感激之誠揣已積叨踰之懼伏以某名慙
鉅下人異隆中無賦雪之詞華乏論天之才辯頃歲纒
萌進取便獲攀援及門人指其登龍託賢時推其附鳳
因得交朋改觀行止增光遂忝決科俄榮筮仕始優游

於諫省旋履歷於霜臺郎署一棲星霜六變而偶茲多
難方因迷津永無振奮之期益勵退藏之志僕射憫其
孤拙哀以棲遲忽垂大恩顧及衰緒孜孜保證矻矻維
持竟使凡材遽塵劇職忝玉堂之侍從掌金殿之書詞
榮非始圖事過初望唯誓永將死節上報生成倍激糜
捐冀申萬一

二

某啟某伏奉勅命授尚書駕部郎中知制誥依前充職

者其藝能無取才格俱凡任孤僻以趨時守顯愚而樂
道敢於榮顯竊冀遭逢伏蒙僕射不次垂恩踰涯降德
彫朽曲施其敏手磨鉛俾耀其銛鋒因得擺脫塵泥昇
騰霄漢專玉堂之詔誥追金馬之遊從尋一作實過津涯
每慙覲冒孰謂纜踰累月又陟華資南宮秩換其詞司
西掖名叅於演綉生成益被灰粉何酬感深空集其涕
洩恩重但期於隕越

謝尚書丞郎給舍啟

某啟某忽蒙宸獎擢處內庭循省荒蕪倍懷兢懼某才
殊二妙譽媿三英趨時既乏於梯媒退跡倍悲於萍梗
某官常廻恩獎曲賜吹揚遂使虛辱成茲忝越列侍從
於金門之下掌書詞於禁苑之中榮非始圖事過初望

謝史館裴相公啟

羅 衮

某啟伏以洪鈞播物已在生成朗鑑通幽寧期照燭伏
以相公二十五丈熙朝德茂軌世才高發言為褒貶之
經迴顧是寒暄之律自叨洪獎愈切寵驚近又見戶部

王侍郎伏知造化工夫不遺纖草丹青潤色偏及偶人
輝華而賤質增榮感激而雄眸有淚實以衮家殊弁冕
紫繼詩書卷懷於盛壯之時浮泛於衰遲之日詞科入
仕尋周一紀之星諫署升朝亦改四年之火雖復毛慙
腹背角困藩籬何嘗不砥礪公方琢磨文術竟以長沙
地窄難呈宛轉之姿南郡鬼逢每受挪揄之恥俄消剝
道顯自明恩霖施而窮澤生流瑞降而枯條更肆得不
乘風奮力搗朽申勞依魯相之門墻永隨車豎仰殷宗

之左右長奉鼎梅卑情無任日夕兢惶生死銜戴之至
謝監脩相公啟

某啟某鄉品慙卑朝班愧近久託運籌之化元無載筆
之能今伏奉恩制伏蒙相公特賜奏授前件官充職者
寵靈重疊敢幸於時來塵忝過多但驚於望外下情無
任戴恩感激量伎兢惶之至伏以相公道壯龍圖情專
鳳策兩掖之內以謹辭為先三館之中以信史為急必
銓名實乃授清華固以時屬敷文事當脩舉列聖之青

編再輯盛朝之鴻藻將鋪是宜對季札以歌唐求孟堅

而述漢然後可以昭彰一代易奕

一作顯赫

千齡如袞之才

非此之任誠欲奉身而退澀懇以辭無傷棧樸之風自

適輪轅之用竊念早依門闥昨侍台階聞善誘而遽已

捧承沾謬恩而莫遑辭讓主文譎諫顧出納以何裨廣

記備言審荒蕪而豈措徒思竭力寧遑覩顏唯當稟奉

公忠執持愚直分職於仲山之下庶展其能受經於尼

父之前冀成其傳効酬之志灰沒為期早情無任銜荷

惕勵憂懼怔營之至

二

某啟幸以弱才託於弘造遂捨寒鄉之士爰升近署之班雖與道翔翔似無邪行而隨波上下安有直詞是以久列編脩常孤事任一家之言莫就空慕馬遷三國之志未聞實慙陳壽深宜免罷稍獲遑寧不謂相公尚貸簡書且敦方冊才授改官之寵仍還帖職之榮乍簪筆於宸軒復和鉛於綸閣中書肆入寧同著作之郎相府

依棲乃類司徒之掾分誠已過恩亦太隆既辭讓以難
諧但憂兢而罔寘穀梁清婉休校力於短長王隱混淆
預甘心於譏誚營職為務投生以酬下情無任感激省
循光忝愧懼之至

謝宰相啟

某啟伏以居有熊左右之司每聞沮誦著周穆存亡之
闕但記戎夫規動止於九天法春秋於百代某雖愚懵
知此重難況復皇朝廢置之初便搜才實近日選求之

慎必在英華峻等級於螭階盛風流於鳳闕某則寒陋
分無希望伏以相公協兆為師奮庸熙載將行大道上
繼於宣尼誘進單門下同於王儉不以某諫垣空食史
閣曠官特興久次之嗟俾授殊遷之命暄臨黍谷方知
律呂之聲調境入蓬山孰謂風飈之道阻徒成踴躍莫
獲逡巡副燕臺尊隗之心奉孔里鑄顏之化巍巍聖德
雖期有舉必書赫赫台光定是無階上報榮懼感激不
任下情

謝諸知己啟

某啟伏奉恩制除授前件官者事匪心期恩將敵至榮懼憂惕不任下情伏以某用之適時言非悟主雖困泥塗之辱敢希朝序之榮伏蒙某官念以吾道依棲斯文宗仰懇動吹噓之力終諧憐獎之心遂使縣吏塵銜擺脫忽同於蟬蛻諫臣清級超昇遽遂於鸞翔叨忝何多提携至此竊復念孤單事契愚魯性靈苟非示以脩塗安得靡茲好爵獻可替否諒無補於皇明徇義忘身庶

粗酬於恩德卑情無任感戴激切之至

二

某啟某操行無竒文章匪贍拾遺左右三年未望於轉
遷約史春秋五夜寧通於夢想斯亦孤單雅分頑魯自
宜忽踐履於清華諒因依於賢達伏以某官優容下位
獎進微才苟君之日月在躬王氏之風塵外物輒忘孤
陋榮遂品題一作苟君之日月在躬道存瞻
矚王氏之風塵外物榮遂品題故得譽徹
中台名聞東觀遽蓬彌縫之地仍忝著作之庭祇奉寵

光若臨泉谷靜循叨竊實自門墻敢不永抱兢銘深虞

負累以當官而贖

疑作贖

忝用舉職以酬知求女媧鍊石

之方潛裨碧落就太史藏山之事

一作筆

試學青編尚覲

宗師更傳規矩下情無任攀戴醜汗之至

三

某啟伏以記事之官顯司存於戴禮侍臣之職正號位

於隋朝自古不輕方今為

一作尤

重豈期幽介遽獲忝塵

此乃某官道著訏謨情敦片善偃彼小人之草列諸君

子之林遂令補袞掖垣仍叨筆削珥貂仙室更踐清華
得不上報鴻恩旁酬重德日月簡編之効敢怠於季一作
學終雪霜松柏之心佇彰於歲晚榮懼感奮不任下情

文苑英華卷六百五十三

欽定四庫全書

文苑英華卷六百五十四

宋 李昉等 編

謝辟署

為同州張評事謝辟并聘錢啟二首

為山南薛從事謝辟啟一首

為東川崔從事謝辟并聘錢啟二首

為河東公謝相國京兆公啟二首

為柳珪謝京兆公啟三首

獻河東公啟二首

上尚書范陽公啟三首

為白從事上陳許李尚書啟一首

為桂州盧副使謝聘錢啟一首

劍門寄上路相公啟一首

代青州掌記謝本府辟啟一首

為同州張評事謝辟并聘錢啟

李商隱

潛啟伏奉榮示伏蒙猥賜奏署今月某日勅旨授官承

命恐惶

一作惟

不知所措某文乖綺繡學之鱣緇負米東

郊止勤色養獻書北闕未奉明恩撫京洛之塵素衣穿
穴訪江湖之路白髮徘徊大夫榮自山陽來臨沙苑固
以室盈東箭門咽南金豈謂搜揚乃加辱眇府稱蓮沼
慙無倚馬之能地號雲門竊有化龍之勢便居帷幄遽
別蓬蒿袁生有望於樵蘇楚子永辭於藍

集作檻

縷刻諸

肌骨知所依歸伏惟特賜鑒察謹啟

二

潛啟錢若干伏蒙仁恩賜備行李重非半兩輕異五銖
子母相權饑寒頓解細看銅郭徐憶牙籌雖云集作神
有魯褒便恐癖如和嶠辦裝無闕通刺有期感戴之誠
不知所喻謹啟

為山南薛從事謝辟啟

傑遜啟今月某日伏蒙辟奏節度掌書記勅下徒有長
裾曾無綵筆初疑誤聽久乃知歸感激慙惶不知所喻
某受天和氣而鮮雄材幸承舊族之華遂竊名場之價

頃者湮淪孤賤綿隔音塵其後從事梓潼經塗天漢初
筵末席披霧覩天自邇以來懷恩莫極鄭玄之腰腹若
掛丹青崔琰之鬚眉常存夢寐方思捧持杖屨廁列生
徒豈望便上仙舟遽塵蓮府尚書士林圭臬翰苑龜龍
方殿大藩將求記室是才子懸心之地詞人効命之秋
豈伊踈蕪堪此選擢思曾顏之供養念陳阮之才華自
公及私終榮且忝伏以家室憂繫初解山川跋涉未任
須至季秋方離上國撫躬泣下尚遙郭隗之門閉目夢

遊已入孔融之座下情無任攀戀銘鏤之至

為東川崔從事謝辟并聘錢啟

前人

福啟伏奉公牒伏蒙辟署觀察巡官某早辱梯媒獲沾
科第吳公之薦賈誼未塞前叨竇融之舉班彪仍當後
忝仰觀蓮幕俯度桂科卯翼不自於他門頂踵實非其
已物但賫仄粉遠逐旌幢雖有命以酬實無言可謝伏
惟俯賜鑒亮

二

福啟錢若干伏蒙賜備行李竊以白馬從軍青鳧受聘
磨文難滅校貫知多陸賈方驗於火花郭况莫矜於金
穴感戴之至不任下情謹啟

為河東公謝相國京兆公啟

前人

某啟今月某日得當道萬安驛狀報伏承遣兵馬使陳
朗賫幣帛鞍馬辟召少男者未敢尋盟遽茲聞喜遐瞻

關闥恨乏羽毛伏以自有縉紳誰無交結朋友不全素

諾在古殊多父子同受深知當今罕集作未見豈期令德

圖於所難男珪曾未成人纔沾下第辨仲謀之菽麥雖

則有餘况安石之芝蘭竊將不可忽依太府便廁英僚

東吳之咄恐自此始西園之讌未知如何此皆相公以

某謬接藩維久依繩墨克降由衷之信將酬事大之心

不然則安得接集作童子於舞雩禮諸生於白社身枝

獲慶城府知歸感激恩光丁寧教誡永言銘鏤尚昧端

倪伏俟簡書來至敝邑則專請張覲評事奉啟狀申陳
慕義無窮措辭莫盡攀附惶戰集作不能究陳謹啟

二

某啟伏奉榮示伏蒙辟署某第二子前鄉貢進士珪充
攝劍南西川安撫巡官并賜公牒舉者某去月得楊侍
御書題微傳風旨初如吉夢終謂戲談非不尋思莫得
端緒今乃竟詢仲眉果降嘉招伸紙發緘悸魂流汗何
者某頃居班列已奉陶甄口裏雌黃屢加彫煥胷中雲

夢過沐涵濡掖之以順風煖之以愛日茲辰議報不在
他門一昨叨裂土田謬分旗蓋適當東道獲事西隣豈
望信在言前榮流意外坤維接畛何酬上相之知坎卦
成占遂報中男之喜且渠譽乖郗桂名媿謝蘭未學周
南召南纔得一科一第縱解問絹不能負薪將何以與
先生並行從大夫之後仰塵帷幄佇雜簪纓况襟帶禹
同咽喉巴濮求於安撫必也機謀深慮異時莫副虛佇
然竊尋史傳所載語父子之間雖石苞獨異石崇而山

濤未知山簡亦豈

集作安

敢保其孱陋遽遣退藏但當授

以一經訓之大杖庶將寡過以謝明恩染翰銜情封牋
寫抱小人多事拜台席以猶賒童子何知上賓階而在
即瞻望閣闈死生以之伏惟深賜鑒信謹啟

為柳珪謝京兆公啟

某啟散兵馬使陳朗至伏奉榮示兼奉公牒伏蒙台署
攝成都府叅軍充安撫巡官者師襄鼓缶或近翫人和
氏搜珉能無驚物跪受高命莫知所裁某藏豹不堅雕

龍未巧徒承庭訓遂廁人曹比衛家之一兒天懸鷓鴣
望鄴中之七子風逸馬牛已吞決科敢思筮仕伏惟相
公以仁義禮智信為基構用溫良恭儉讓為藩籬堯時
則業貫夔龍殷代則道符尹說入秉文教出曜兵權揮
神鋒而劍合陰陽述雅誥而筆開造化况天有井絡地
稱坤維控三巴百濮之雄帶南詔西山之險人稱輿府
帝謂殊藩固已一作廣集豪英用資叅佐玳簪珠履綠
水紅蓮成籍籍於淮山致憧憧於燕路若某者徒將慕

藺何足望回又安敢

集作可

拂其塵埃加以冠履伏思相

公直以大人頃居班列獲奉恩私羅照乘於驪淵覬歸
昌於鳳穴未見其可處之不疑曾不念木朽石頑雕鐫
莫就榆瞑豆重性分難移古人所以有以榮為憂受恩
如敵斯言之作珪也有焉今月六日辰時輒奉辟書具
聞晨省仰承嚴旨便定行期而又內奮弟兄外誘交友傳
翼類虎生角如麟事誠實於顯榮勢莫知其報効尚須
旬日方拜旌旄唯當洗心為齋延頸以望持千尋之建

木想像瓌姿周萬頃之澄波比量曠度載恩揣已授集作

投命依仁神之聽之百生如一謹啟

二

某啟伏蒙榮示賜及前件衣服段及束絹等謹依處分
捧授訖伏以大人自處通班彌脩儉德田園唯恐蕪沒
子弟不免饑寒去春成名首秋歸覲雖才非張載未刊
劔閣之銘而志慕胡威敢問荊州之絹豈謂集作相公
復以簡書召署筐篚加恩古者贖百里奚纜持五穀誚

程不識猶惜一錢况某碌碌無竒庸庸自守敢邀厚幣
來自雄藩品目難名珍纖可玩仰李膺之德尚未登門
讀戴聖之書集作已驚潤屋下情無任戴荷悚懼之至
謹啟

三

某啟伏奉榮示令將前件馬及行官延接者某將仕大
藩苦無遠道特蒙恩禮曲賜優崇扶以武夫濟之良馬
經過燕館將耀於鳴駟夢寐梁園只思於飛鞚感佩之

至不任下情謹啟

獻河東公啟

商隱啟伏奉手筆猥賜奏署某少而孱懦

集作

長則艱

屯有志為文無資就學雖雜賦八首或庶於馬遷而讀

書五車遠慙於惠子契濶湖嶺淒涼路岐罕遇心知多

逢皮相昔魯人以仲尼為佞淮陰以韓信為怯聖哲且

猶如此尋常安能免矣

集作

是以良背却行求心自處

羅含蘭菊仲蔚蓬蒿見芳草則怨王孫之不歸

集作

撫

高松則歎大夫之虛位不可終否屬於高明伏惟尚書
春日同和秋霜共冽叔子則九代清德稚春則七葉素
儒君子立言永為周禮正人得位長作歲星今者初涉
將壇始敷賓席射江澳集作與壤潼水名都俗擅繁華地
多材雋指巴西則民皆譙秀訪臨邛則客有相如舉織
繳以下冥鴻執定鏡而求西子唯所指命便為丹青若
某者又安可炫露短材叨塵記室鹽車款段徒逢伯樂
而鳴土鼓迂踈恐致文侯之卧承命知忝撫懷自驚終

無喻蜀之能

集作心

但誓依劉之願未獲謁謝下情無任

感激攀戀之至謹啟

二

某啟伏蒙示及賜錢三十五萬以備行李謹依榮示捧
領訖伏以古求良材必有禮幣一束芻皆堪貺美五穀
皮未曰輕齋况某跡忝諸生名非前哲尚遙玉帳已賚
金錢訪蜀郡之卜人懸之莫竭遇河間之姪女數且難
窮未草檄以愈風不執鞭而獲富敢將潤屋且以騰裝

戴荷之誠寄諭無地

上尚書范陽公啟

某啟仰蒙仁恩俯賜手筆將虛右席以召下材承命恐
惶不知所措某幸承舊族早預儒林鄴下詞人夙蒙推
與洛陽才子濫被交遊而時亨命屯道泰身否成名踰
於一紀旅官過於十年恩舊凋零路岐悽愴薦禰衡之
表空出人間嘲揚子之書僅盈天下去年遠從桂海來
返玉京無文通半頃之田乏元亮數間之屋隘傭蝸舍

危託鶯巢春畹將遊則蕙蘭絕逕秋庭欲掃則霜露沾
衣勉調天官獲昇甸壤歸惟却掃出則卑趨仰燕路以

長懷望梁園而結慮尚書道光士範德冠民宗愷悌之

化既流鎮靖之功方懋竊思上國投技

集作
刺

東都及門

唯交抵掌之談遂辱知心之契載惟浮泛類

集作
頗

陟光

陰豈期咫尺之書終訪蓬蒿之宅感義增氣懷仁識歸
便當焚遊趙之登毀入秦之屨束書投筆仰副嘉招謁
謝未聞下情無任感戀之至謹啟

二

某啟某猥以謏聞仰承嘉命處囊引喻未施下客之能
在握稱珍遂忝上卿之列循揣斯久兢惶不任况尚書
學摠百家術窮三略文鋒筆力抉揚馬之懸門劍氣弓
聲割韓彭之右地永言賓畫宜在民宗豈意非才旋蒙
過聽未至居右既乏相如之譽後來在上終興汲黯之
嗟手足分榮里閭交慶行吟花幕卧想金臺未離紫陌
之塵已夢清淮之月依仁佩德白首知歸伏惟俯賜恩

察謹啟

三

某啟絹若干疋特蒙仁恩賜備行李謹依數捧領訖嘉命猥臨厚賚仍及捉襟見肘免類於前括裂裳裹踵無取於昔人感佩恩私不知所喻謹啟

為白從事上陳許李尚書啟

某啟伏奉公牒辟署節度巡官兼伏奉榮示賜及疋帛等才異當仁事從非望拜受失度跪捧難勝某符彩無

奇局量有限徒以杜林外氏學富文華謝朗舉宗皆親
儒墨齡年有志壯歲無名瞻遺構以自驚奉成書而未

遂重以零丁屬疊息類非蕃決稚圭之甲

集作射

科則行

有違離之苦效敬通之却埽則坐無供養之資徘徊盛
時鬱抑衷懇敢思聘召忽賜降臨尚書分戚天家揚輝

王國攻文而丹青讓巧論兵而鈎絡慙能頃者言自執

金雄推受脈河橋三疊當弟子之興尸易水一

集作二城

值將軍之下世功深式遏道著綏和中間衛朔拒君邢

名起亂紀侯去國汾晉挺災語其巢穴之間在我封鄰
之側而又潛調遠轡密運良籌輕敵殘人則勇於不敢
代謀持重則令在必行今者趙北變風淮南受賜戎麾
始至賓驛初開固合大選英髦以充僚屬豈期恩集作思

慮遂及孱微賁帛豐盈富圭重復慈親喜問孀婦號驚

姓名遂列於羣英簪笏遽集作再光於單緒感深肌骨戴

重邱山未伸刺股集作投刺之誠已定糜軀之誓伏以久將

栖託兼議扶迎更涉旬時方遂行李漆園之蝶濫入莊

周之夢竹林之虱永依中散之身蓮幕含誠金臺結想
仰瞻恩顧伏撓精魂謹奉啟陳謝謹啟

為桂州盧副使謝聘錢啟

戡啟錢若干伏蒙賜備行李謹依數捧領訖多若鑿山
積如別藏丙科擢第未全染於桂香盛府從知却自驚
於銅臭禮於是重富而可求既不憂貧惟思報德伏惟
俯鑒微懇謹啟

劍門寄上路相公啟

胡曾

某啟某華戶庸人荷衣賤子道慙墨妙業媿筆精效枚
叟之文章雖憐七發感潘生之歲月已歎二毛失路腸
迴迷邦足別蟻棲培塿蛙伏潢洿自笑柴愚誰憐參魯

尚思逐鹿未分牽羊將趨渙汗

疑作汗漫

之程詎學邯鄲之

步但以才非迫出性乏孤標雖勤側管之窺終類正牆
之視有心吐鳳無夢懷蛟不痊曹操之頭虛刺蘇秦之
股誠宜世棄敢望時來方嗟碌碌之生忽忝戔戔之幸
朽株委地永甘夫子之捐枯骨凝塵豈料昭王之市遍

身德澤滿目恩輝寧止負嵩仍兼戴華既蒙蜀顧敢望
秦留即遂面走鹿頭背馳鶉首如昇青昊似入玄都不
知劔閣之艱豈覺刀州之遠伏惟相公神資重器天縱
偉才邦國金城朝廷玉燭文高庾月詞峻謝山纔見紫
髯便居黃閣陶鈞百辟啟沃一人議平吳皓之時雖云
推局報破秦堅之日不廢圍碁故能早執化權又司政
柄今則暫辭龍闕來鎮龜城將軍之細柳雖新丞相之
鹽梅仍舊不煩壯士自伏雄圖揚麾而氛祲晨銷按節

而妖星夜落劉馬原野昔為累卵之鄉杜宇山河今作
覆盆之地曾實慙孤陋叨沐招延鄭驛將窮燕臺漸近
那能倚馬妄竊攀龍仰天上之程途已親台席指人間
之岐路尚感客星披霧非遙拜塵在即無任

代青州掌記謝本府辟啟
顧雲

某啟今日衙前虞候某乙賫到簡牒伏蒙召署節度
掌書記者伏以記室司存雄藩重務吳中草檄始召陳
琳鄴下裁牋方徵阮瑀咸持彩筆以掌軍書况地控全

齊封連巨浸有外夷之琛賚多土貢之賦輿假道既繁
飛章亦衆永言斯任宜委高才且某徒效聚螢未嘗吐
鳳讀傳而雖云成癖為文而未見愈風忽辱簡書遽蒙
辟召捧函增懼撫已知歸遐想膺門已積靡軀之志仰
瞻龍節空懷拜賜之誠

文苑英華卷六百五十四

欽定四庫全書

文苑英華卷六百五十五

宋 李昉等 編

謝賜賚

謝趙王賚絲布等啟一首

謝趙王賚絲布等啟二首

謝趙王賚白羅袍袴啟一首

謝滕王賚巾啟一首

謝明皇帝賜絲布等啟一首

謝趙王賚犀帶啟一首
謝趙王賚米啟一首

謝趙王賚乾魚啟一首
謝滕王賚馬啟一首

謝滕王賚豬啟一首

謝滕王賚馬并繖啟一首

謝所知賚集賢墨啟一首

謝衣段啟一首
謝賜錢啟一首

雜謝

謝李相公示手札啟一首

謝李中丞安存崔簡家屬啟一首

謝門下武相公啟一首 謝中書張相公啟一首

謝僕射李相公啟一首 謝裴相公啟一首

謝竇相公啟一首 謝宰相啟一首

謝草詞啟一首 謝江陵借宅啟一首

謝江陵津致赴闕啟一首

謝賜賚

謝趙王賚絲布等啟 庚信

某啟鄭叡至蒙賜絲布綾等十段王褒至又蒙許賜錢
等望外之恩實符大賚非常之錫乃溢生涯曳練且觀
無勞白馬之望流泉欲委佇見青鳧之飛楊池掘荷李
園移樹既欣谷利彌思青木一作林陳留下粟有媿深恩
櫟陽雨金翻慚曲施靈臺久客從此數炊黍谷長寒於
今更暖從雲夢之田不踰此樂得豐城之劍未均斯喜
謹啟

謝趙王賚絲布啟

庾信

某啟奉教垂賚雜色絲布三十段去冬疑閉今春嚴勁
霰似瓊田凌如鹽浦張超之壁未足鄣風袁安之門無
人開雪覆烏毛而不暖燃獸炭而逾寒遠降聖慈曲垂
矜賑論其蠶月殆罄桑車津實一作費秉杼幾空織室遂
令新市數錢忽疑販綵平陵月夜驚聞擣衣妾遇新繅
自然心伏妻聞裂帛方當含笑莊周車轍實有涸魚信
陵鞭前元非窮鳥仰蒙經濟伏荷深慈謹啟

二

某啟某息荀娘昨蒙恩引曲賜絲布等五段南冠獲宥
既預禮延稚子勝衣還蒙拜謁關尹津梁之織鄴地雙
絲扶風彩文之機仙園獨蠶青衿宜襲書生無廢學之
詩春服既成童子得雩沂之舞况復栖烏挾子同知桂
樹之恩澤雉將雛共喜行春之令根株一潤枝葉俱榮
謹啟

謝趙王賚白

皂

一作

羅袍袴啟

某啟垂賚白羅袍袴一具程據上表空論雉頭王恭入

雪虛稱鶴氅未有懸機巧綜

一作
蝶

變躡竒文鳳不去而

恒飛花雖寒而不落披千金之暫暖棄百結之長寒永
無黃葛之嗟方見青綾之重對天山之積雪尚得開襟

冒廣樂

一作
履

之長風猶當揮汗白龜報主終自無期黃

雀謝恩竟知何日

一作皆藝文類聚

謝滕王賚巾啟

某啟奉教垂賜鹿子巾一枚解角新胎戴藤初孕落星
交映連珠踈點盤龍之刀既剪長命之縷仍縫翠羽懸

推芙蓉高讓遊斯隱士足笑穀皮入彼春林方誇笋籜
某蓬鬢鬆颯衰容者朽三秋不沐實荷今恩十年一冠
彌欣此賚謹啟

謝明皇帝賜絲布等啟

臣某啟奉勅垂賜雜色絲布綿絹等三十段銀錢二百
文某比年以來殊有闕乏白社之內拂草看冰靈臺之
中吹塵視甌懟妻狠妾既嗟且憎瘠子羸孫虛恭實怨
王人忽降大賚先臨天帝賜年無踰此樂仙童贈藥未

均斯喜張袖而舞玄鶴欲來撫節而歌行雲幾斷所謂
舟楫無岸海若為之反風薺麥將枯山靈為之出雨况
復全抽素蠶雪坂疑傾併落青鳧銀山或動是知青牛
道士更延將盡之命白鹿真人能生已枯之骨雖復拔
山超海負德未勝垂露懸針書恩不盡蓬萊謝恩之雀
白玉四環漢水報德之蛇明珠一寸某之觀此寧無愧
心直以物受其生於天不謝謹啟

謝趙王賚犀帶等啟

某啟奉教垂賚犀裝帶錢十貫魏君寶帶特賜劉楨趙
王國租偏資裝楛貫藏文馬如燒安息之銀帶插通犀
似獵雲南之獸北郭騷之長貧是所甘愜南宮敬之載
寶殊非念望花開四照唯見其榮鰲戴三山深知其重

昔沈羲將盡逢司命而還生

三國志注童子謂杜畿司
命使我召子畿固請童子

謂求代者
沈羲未詳

士變行埋

集作
終

值仙人而更活今日慈矜斯

之謂矣馬前驅而導路或似識恩鷄未曉而開闢容能

報主謹啟

謝趙王賚米啟

前

人

見藝文類聚

某啟奉教垂賚米十石丹烏銜穠既集西周黃雀隨車
還飛東市漬而為種不無霜雪之精取以論兵即有山
川之勢某陋巷簞瓢櫛風沐雨剝榆皮於秋塞掘蟄鷲
於寒山仰費國租遂開塵甑非丹竈而流珠異荆臺而
炊一作玉東方朔之捧米既息長饑西門豹之墾田方

慙此賚

謝趙王賚乾魚啟

某啟蒙賚乾魚十番醴水朝浮光疑朱鼈文鯨夜觸翼
似青鸞況復洞庭鮮鮒溫湖美鯽波瀾成雨鱗甲防寒
某本吳人常想江湖之味及其饑也唯資藜藿之餘慈
賚渥恩膏腴流竈不勞獅子之亭即勝雷池之長翻驚
河伯獨不受人足笑任公終年垂釣謹啟

謝滕王賚馬啟

前

人

見藝文類聚

某啟奉教垂賚烏騮馬一匹柳谷未開翻逢紫鷲陵源
猶遠忽見桃花流電爭光浮雲連影張敞畫眉之暇直

走章臺王濟飲酒之歡長驅金埒謹啟

謝滕王賚猪啟

某啟奉教垂賚肥豕一腔白腹見珍度遼東之水赤欄
為重對襄陽之城忽降全恩謹充炮烙孫弘牧於溜水
唯以求錢卜式養於上林豈知其味謹啟

謝趙王賚馬并繖啟

某啟奉教垂賚紫騮馬并銀釘乘具紫紬繖一張上天
降雨特垂深澤若木流光偏蒙私照迴茲翠蓋事重劉

基之恩降此青驪榮深李忠之賜北部丹帷便須高捲
西河竹馬即已郊迎在命之輕鴻毛浮於弱水知恩之
重龜一作背負於靈山况復驚鴻別水但見徘徊黃鶴
去關唯知反顧樓戀之心事同於此

謝所知賚集賢墨啟

溫庭筠

某啟即日門幹至奉披榮示垂賚集賢墨一挺竹山竒
製上蔡輕煙色掩緇帷香含漆簡雅復三臺故物貴重
相傳五兩新膠乾輕入用猶怨於潛曠遠建業尫羸韋

曜名方即求鷄木傳玄佳致別染龜名思加於蘭署郎
官禮備於松檮介婦汲妻衡弟所未窺觀廣記漢儀何
嘗著列况又玄洲上苑青瑣西垣離字猶新疑籤尚整
帳中女史每襲清香架上仙人常持縹帙得於華近辱
在庸虛豈知夜鶴頻驚殊慙志業秋蛇屢縮不稱精研
唯憂海物虛投蠟槃空設晉陵雖壞正握銅兵王詔徒
深唯磨玉硯捧受榮佩不任下情

謝衣段啟

張玄晏

某啟某伏奉手誨伏蒙相公十九兄特以某初叨宸獎
賜及衣服段等捧戴尊念感激伏深况鶴紋價重龜甲
樣新織華不讓於齊紈輕楚能均於魯縞掩新蒲之秀
色奪寒兔之秋毫莫稱頑姿難勝緝旨倍切肝一作肺
之感永為楊襲之榮謹啟

謝賜錢啟

胡曾

曾啟曾業謝懸頭道非刺股未能入洛安可下遼空懷
逐鹿之心莫遇斬蛇之世囚拘翰墨困厄塵泥虛費宣

毫枉銷蜀縲不救鋤蘭之禍詎禳伐樹之災自歎龍鍾
誰知牛鐸又以山東藩鎮江表節廉悉用豎儒皆除迂
吏胷襟齷齪情志荒唐入則粉黛遶身出則歌鍾盈耳
但自誅求白璧安能分減黃金雖設朱門何殊亡國徒
開玉帳無異荒墟遂使寧戚無扣角之歌鄒陽乏曳裾
之地伏惟相公英風獨振偉量孤標推葛亮之秤心負
姜維之斗膽內安宗廟外却蠻夷魚水賢良墳麓骨肉
桃李滿於衢路金帛遍於風塵六合之中一人而已是

以昨者不度庸陋輒有干祈方虞按劍之勃然敢望亭
刀之莞爾俄頌清俸遽恤白衣朝乏半干夕盈五萬豈
期庸蹇忽忝遭逢不是孟嘗詎聽馮諼之缺若非趙勝
那知毛遂之錐遇既重於西河知亦深於北海感恩泣
處未成泉客之珠撫已哭時空抱荆山之玉限以程遠
陳謝末由感激生成不任死所

雜謝

謝李相公示手札啟

吉甫

柳宗元

某啟六月二十九日衡州刺史呂溫道過永州辱示相

公手札省錄狂瞽收撫羈縲沐以含弘

英華作洪避諱

之仁忘

其進越之罪感深益懼喜極增悲五情交戰不知所措
宗元質性庸塞行能無取著書每成於廢疾進德且乏
其馨香常願操篲醫門掬溜蘭室良辰不與夙志多違
昨者踴躍殘魂奮揚蓄念激以死灰之氣陳其敝箒之
詞致之煙霄分絕流盼今則垂露在手清風入懷華袞
濫褒於赭衣龍門俯收於堦井藻鏡洞開而秋毫在照

文律傍暢而寒谷生輝化幽鬱之志若覲清明換兢危
之心如承撫薦非常之幸豈獨此生伏以淮海劇九天
之遙瀟湘叅百越之俗傾心積念長懸星漢之上流形
委骨永淪魑魅之羣何以報恩唯當結草無任喜懼感
戀之至謹啟

謝李中丞安存

集作撫

崔簡家

集作戚

屬啟

前人

某啟伏見四月六日勅刺史崔簡以前任贓罪決一百

長流驪州伏奉去月二十三日牒崔簡家口牒州安存
并借官宅什器差人與驅使者伏惟中丞以清直去敗
政以惻隱撫窮人罪跡暴著則按之以至公家屬流離
則施之以大惠各由其道咸適於中威懷並行仁義齊
立繩愆糾繆列郡肅澄清之風匡困資無闔境知噢咻
之德凡在巡屬慶懼交深伏見崔簡兒女十人皆柳氏
之出簡之所犯首末知之蓋以風毒所攻集作漸成狂
易不知畏法坐自抵刑名為贓賄卒無儲蓄得罪之日

百口磬然叫號羸頓不知所赴儻非至仁厚德深加憫
恤則流散轉死期在須臾某幸被縲囚久沐恩造至於
骨肉又荷哀矜循念始終感懼無地謹勒祇承人沈澹
奉啟陳謝下情輕瀆

謝門下武相公啟

劉禹錫

某啟某一坐飛語廢錮十年昨蒙徵還重罹不幸詔命
始下周章失圖吞聲咋舌顯白無路豈謂烏烏微志惻
于深仁恤然動拯溺之懷煦然存道舊之旨言念骸棘

慰安蒼黃推以恕心期於造膝重言一發睿聽克從迴
陽曜於肅殺之辰沃天波於蹭蹬之際俾移善地獲奉
安輿率土知孝治之源羣生識人倫之厚感召和氣發
揚皇風豈唯匹夫獨受其賜某即以今月十一日到州
上訖守在要荒拘於印綬中鞫詣謝有志莫從誠知集作
如微生不足酬德捐軀之外無地寄言効節肅屏虔然
心禱無任懇悃屏營之至謹勒軍事衙官守左威衛慈
州吉昌府別將員外置同正員常懇

謝中書張相公啟

某啟某智乏周身動必招侮一坐飛語如衝駭機昨者
詔書始下驚懼失次叫閭無路擠壑是虞草木賤軀誠
不足惜烏烏微志實有可哀伏蒙聖慈遽寢前命移蒞
善部載形綸言凡在人臣皆感至德凡為人子同荷至
仁豈唯鰥生獨受其賜伏以相公心符上德道冠如仁
一夫不獲感見於色密啟一作音未下歎形于言竟廻三
舍之光能拔九泉之厄袁公之平楚獄不忍錮人晏子

之哀越石仍伸知己所以慶垂眉祚言成春秋神理孔
昭報應斯必身侔蟬翼何以受恩死輕鴻毛固得其所
卑守有限拜謝末由無任感激兢惶之至

謝僕射李相公啟

某啟州吏還伏蒙擺落常態手筆具書言及貞元中登
朝人逮今無十輩又集作及發中書相公一函具道閣下

函言囊遊顏間

集作
顏問

頗有哀色夫溝中之木與犧象同

體追琢不至則坐成枯薪朱而藍之猶足為器苟液楛

見莊子集
作滿非

曲戾不足枉斧斤願為庭燎以照嘉客謹啟

謝裴相公啟

某啟某遭罹不幸歲將二紀雖累更符竹而未出網羅
親知見憐或有論薦如陷還潭動而愈沉甘心終否無
路自奮豈意天未勦絕仁人持衡紆神慮於多方起堙
淪於久廢居剝極之際一陽復生出坎深之中平路資
始通籍即位分曹樂都喬木展舊國之思行雲有故山
之戀姻族相賀壺觴盈門官無責詞始自今日禽魚之

志誓以死生草木之年惜其晚晚章程有守拜謝無由
瞻望巖廊虔然心禱謹啟

謝竇相公啟

某啟其一辭朝列二十三年雖轉郡符未離謫籍卑濕
生疾哀遲鮮歡望故國而未歸如痿人之念起昨蒙罷
免甘守丘園相公不棄舊遊特哀久廢每奉華翰賜之
衷言果蒙新恩重忝清貫薦延有漸拯拔多方六律變
幽谷之寒一九銷彌年之疹鍛翮將舉危心獲安布武

夷途自此而始分曹有繫拜謝無因瞻望德藩坐馳精爽無任感激之至謹啟

謝宰相啟

張玄晏

某啟某文愧靈蛇質慙威鳳謬因鎔鑄遂竊顯榮粉署握蘭詎有堂堂之稱禁林視草全乖籍籍之名驟忝轉遷盡由擡舉伏蒙相公俯迴念錄過賜褒稱尊誨下臨恩言俯被假金駿為駕駘之飾賤骨難勝引朱紘於焯朽之餘深恩有自

謝草詞啟

某啟昨日獲忝轉遷出於提獎伏知舍人次當視草曲
賜褒稱裁成五色之紛綸啟導九霄之渥澤過勞江筆
潤色一作特潤堯言指頑石為瑤瑾之流謂駕馬有驂騮之
足揣循驚感倍切肺肝

謝江陵借宅啟

羅 袞

某啟伏以袞荒扉夙掩葦路今飄雖曳裾果在於朱門
而握髮何妨於白屋伏蒙令公獎以來能擇地去俟朝

天恐馬援之災氛寧逃漏濕念揚雄之風雨須託帡幪
特借華居俾安滯跡況復牀分上下器備圓方障錦飄
紅則土皆被繡幕雲浮翠則木鮮呈材愛忽異於吾廬
誤將同於君室遂得彌寬僕后更盡依劉宛如夫子之
牆不在隸人之館揣循涯分抃戴恩光家雖喪而狗已
如歸關欲度而雞不難學館開碣石略為鄒衍之身臺
認章華永荷楚王之德下情無任感遇激切之至伏惟
俯賜鑒察謹啟

謝江陵津致赴闕啟

袞啟伏蒙令公念以赴闕奔馳臨途窘罄特頒厚賜用

備促

一作叙

裝捧命循涯無任荷戴惶灼之至伏以袞拙

艱成性窮約處身寧殊枕社之郎謬列伏蒲之地昨以

西京無象南國迷方蒼黃於河華之間流落於漢地之

外荊州劉表幸獲依棲南郡馬融叨陪訓說爰從殺節

以及熙春恩知將日月兼深惠卹與邱陵比峻今則周

傾再定禹會重脩既憑桓后之功且懼防風之戮輒將

行計上軫沖襟伏惟令公韜世量弘濟人心侈組駢緡
緡委彼貨泉七百里以趨程茲辰頓贍二十萬之為贈
冷代所稀得不泣類鮫人慙同劒客歸赤墀而有賴顧
玄幙以難忘突劒觸鋒始稱効酬之分抽毫命牘終餘
感慨之誠竟之雄詞徒揚懦氣銘誓激切不任下情伏
惟俯賜鑒察

文苑英華卷六百五十五

欽定四庫全書

集部

文苑英華卷六百五十八至

詳校官給事中臣李臺

助教臣常循履勘

總校官進士臣朱鈺

校對官中書臣王瓚

謄錄監生臣徐步青

欽定四庫全書

文苑英華卷六百五十六

宋 李昉等 編

謝文序并和詩

謝滕王集序啟一首
謝趙王示新詩啟一首

上高長史述和詩啟一首

謝皇太子玉華山宮銘賦啟一首

上從舅侍御啟一首
和閨情詩啟一首

謝河東公和詩啟一首
獻侍郎鉅鹿公啟一首

上文章啟上

上薛令文章啟一首

上恩光曲詞啟一首

上武侍極啟二首

上李常伯啟一首

上皇甫常伯啟二首

上吏部裴侍郎啟一首

謝文序并和詩

謝滕王集序啟

庾信

某啟伏覽制垂賜集序紫微懸映如傳闕里之書青鳥
遙飛似送層城之壁若夫甘泉宮裏玉樹一叢玄武闕

前明珠六寸不得譬此光芒方斯照燭有節有度即是
能平八風愈唱愈高殆欲去天三尺殿下雄才蓋代逸
氣橫雲濟北顏回關西孔子譬其毫翰則風雨爭飛論
其文采則魚龍百變蒲桃繞館新開碣石之宮脩竹夾
池始作睢陽之苑琉璃汎酒鸚鵡承杯鳳穴歌聲鸞林
舞曲況復行雲逐雨迴雪隨風湖陽之尉既成為喜之
因春陵之侯便是積慶之地其本乏材用無多述作加
以建鄴陽九劣免儒礪江陵百六幾從士一作隴至如

殘編落簡並入塵埃赤軸青箱多從灰燼比年疴恙彌
留光陰視息桑榆已逼蒲柳方衰不無秋氣之悲實有
途窮之恨是以精采替亂頗同宋玉言辭蹇吃更甚揚
雄一吟一詠其可知矣好事者不求知音者不用非有
班超之志遂已棄筆未見陸機之文久同燒硯至於凋
零之後殘缺所餘又已雜用補袍隨時覆醬聖慈憐愍
遂垂存錄始知揄揚過差君子失辭比擬從橫小人迷
惑荆玉抵鵲正恐輕用重寶龍淵削玉豈不徒勞神慮

匠石迴顧朽材變於彫梁孫陽一言奔蹄成於駿馬故
知假人延譽重於連城借人羽毛榮於尺玉溟池九萬
里無踰此澤之深華山五千仞終愧斯恩之重即日金
門細管未動春灰石壁輕雷尚藏冬蟄伏願聖躬與時
納豫南陽寶雉幸足觀瞻鄜縣菊泉差能延壽伏遲至
鄴可期從梁有日同杞子之盟會必欲瞻仰風塵共薛
侯而來朝謹當逢迎冠蓋魚腸尺素鳳足數行書此謝
辭終知不盡謹啟

謝趙王示新詩啟

某啟鄭獻至奉手教累紙并示新詩八體六文足驚毫翰四始六義實動性靈落落詞高飄飄意遠文異水而湧泉筆非秋而垂露藏之山嵒可使雲霧鬱起濟之江浦必當蛟龍繞船首夏清和聖躬怡裕琉璃彤管鵲顧鸞迴婉轉綠沉猿驚鴈落下風傾首以日為年捷為舍人實有誠願碧鷄主簿無由遂心寂寞荆扉踈蕪蘭徑駢駕來梁未期卜日遣騎到鄴希垂枉道

上高長史述和詩啟

李嶠

某啟近於錄事叅軍杜延昌處伏見公秋月遙想洛城
十韻之作曲中之妙傳乎郢客之聲天下之珍得自隋
侯之掌鳳鳴六呂龍文九光駭屬竒觀相趨動色若乃
政理餘隙翱翔多暇臨八水之高秋企三河之上國衣
冠濟濟入青瑣而步丹墀車馬諠諠下銅衢而赴金谷
人物仙舟之會風塵俠窟之遊莫不屬想心目託情謠
詠九廻靈府遙馳雨露之郊千里神畿近接風雲之思

雕文將錦綉同美惠氣與芝蘭等馥用迥秦肆懸輕呂氏之金持入周京即貴洛陽之紙足使兩都賓主羞談翰墨二陸兄弟耻論詞賦死者可作賈生為入室之徒來者難誣潘子得扶輪之地某學異通敏才非沉鬱刀筆為吏趨馳之歲月已多黼藻成文雅頌之風流尚缺平原從者終慙入楚之遊闕里門人空積後陳之歎徒以夙承光彩早延提拂曾將薄伎見知思以庸音自効輒忘固陋敢有和歌登卞肆而論寶入夔門而撫節擬

託非倫揣摩增覲謹啟

謝皇太子玉華山宮銘賦啟

許敬宗

臣敬宗行成季輔等啟昨晚內坊丞王君德奉宣令賚
臣等玉華山宮銘賦二本拜承恩貺駭抃交懷跪翫清
辭早河溢目伏惟殿下天資學府道貫生知絢發詞林
若春華之麗韶景漪清碧海譬秋水之澹晨霞仙鶴和
吟慙八音於雅韻神龍緝彩謝五色於彫文綺布天庭
雲生石砌理含貞邃雅達谷處之端趣極幽閑妙盡崑

居之體煙松合翠露桂分紅察彼殊形翻然共色究寫
真之奧旨擅體物之窮神若乃漢月鈎空乍臨珠箔石
苔垂髮或映莊帷莫不理超詞表意生文外自餘清拔
觸類竒新成若神化之工光乎性道之製蓋由基天擬
裕纂聖凝離故能邁古超前納卿雲於度內逾儔絕侶
括啟誦於胷中臣等忝荷殊私曲蒙垂示見所未見情
百恒情無任鳧藻之懷謹上啟陳謝謹啟

上從舅侍御啟

王勃

某啟一昨弟勛至奉命以憲臺詩十首垂示氣橫霜暑
彩洞雲扃綉衣兼藻肆之華白簡控玄機之奧仙驄在
馭踐文路而驅神獬冠臨下望詞林而直指某質惟茅
艾名隔縉紳虛霑自出之榮每愧諸甥之列恩華曲被
誨誘傍臨識謝知音榮深覩奧虞韶忽奏聽律呂而忘
疲楚匣遙開仰光芒而不暇昔孔融之逢元禮罕覩高
文王祭之謁伯喈終慙懿戚援今企古議德疇恩荷慄
兼儲疑悲欣兩集但才非酷似攀宅相而多慙慕切如

存臨渭陽而增感不勝荷戴屏營之至

和閨情詩啟

駱賓王

賓王啟學士表慶隆奉宣教旨垂示閨情詩并序跪發
珠韜伏膺玉札類西秦之鏡照澈心靈同南指之車導

引

集作發

迷誤竊惟詩之興作兆基邃古唐歌虞詠始載

典謨商頌周雅方陳金石其後言志緣情二京斯盛含
毫瀝思魏晉彌繁布在鱣簡差可商畧李都尉駕鸞之
辭纏綿巧妙班婕妤好霜雪之句發越清迴平子桂林理

在文外伯喈翠鳥意盡行間河朔詞人王劉為稱首洛

陽才子潘左為先覺若乃子建之牢籠羣彥士衡之籍

甚一集作時並文苑之羽儀詩人之龜鏡爰逮江左謠

詠集作不輟非有神骨仙才集作專事玄風道意顏謝

特挺牋辭典麗英華作顏謝詩為麗則恐非自茲已降聲律稍精其

間沿改莫能正本天縱明睿卓爾不羣聽新聲鄙師涓

之作聞古樂笑文侯之睡以封魯之才追自衛之迹弘

茲雅奏抑彼淫哇澄五際之原攷四始之弊固可以用

之邦國厚此人倫俯屈高調聊同下俚

集作里

然思入態

巧文隨手變雅調慙其曼聲延年愧其新曲走以不敏

謬蒙提汲謹抽詞奉和輕以上呈未近詠諤伏深羞悚

集作悚慙謹啟

謝河東公和詩啟

李商隱

商隱啟某前因暇日出次西溪既惜斜陽聊裁短什蓋以徘徊勝境顧慕佳辰為荒草以怨王孫借美人以喻君子思將玳瑁為逸少裝書願把珊瑚與徐陵駕

一作架

筆袞然而作曾無足觀不知誰何仰達尊重果煩屬和

彌復驚

集作
兢

惶某曾讀隋書見楊越公地處親賢才兼

文武每舒錦綉必播管絃當時與之握手言情披襟得

侶者惟薛道衡一人而已及觀其唱和乃數百篇力鈞

聲同德隣義比彼若陳葛天氏之舞此必引穆天子之

歌彼若言太華三峯此必曰潯陽九派神功古迹皆應

物無疲地理人名亦爭承不缺後來酬唱罕繼聲塵嘗

以斯風望於哲匠豈知今日屬在所天坐席行衣分為

七覆煙花魚鳥置作五衡

集作衡

詎能狎晉之盟實見取

鄩之易不以釁鼓惠莫大焉恐懼欣榮投錯無地來日
專冀謁謝伏惟鑒察謹啟

獻侍郎鉅鹿公啟

某啟今月某日舍弟新及第進士羲叟處伏見侍郎所
制春闈於榜後寄呈在朝同年兼簡新及第諸先輩五
言四韻詩一首夫玄黃備綵集作彩者繡之用清越為樂
者玉之奇固以慮合玄機運清俗累陟降於四始之際

優游於六義之中竊計前時承榮內署栢臺侍宴熊管
從政式以風騷仰陪天籟動沛中之舊老駭汾水之佳
人非首義於論思實終篇於潤色光傳樂錄道煥詩家
况屬詞之工言志為最自魯毛兆軌蘇李揚聲代有遺
音時無絕響雖古今異制而律呂同歸我朝已來此道
尤盛皆陷於偏巧罕或兼材枕石漱流則尚於枯槁寂
寞之句攀鱗附翼則先於驕奢豔佚之篇推李杜則怨
刺居多效沈宋則綺靡為甚至於秉無私之刀尺立莫

測之門墻自非託於降神安可定夫衆製伏惟閣下借
其餘力廓此大中足使同僚盡懷博我不知學者誰可
起予某比興非工顛蒙有素然早聞長者之論夙託詞
人之末淹翔下位欣託知音拊集作賀贊之誠翰墨無寄

况乎仲氏實預諸生榮沾洙泗之風高列偃商之位仰
惟厚德願沐餘輝輒罄鄙詞上攀清唱聞郢中之白雪

媿列千人比齊日之黃門慙非八斗集作干冒尊重伏

用兢惶其詩五言四首謹封如右集作

別

上文章啟上

上薛令文章啟

陳子昂

某啟一昨恭承顯命垂索拙文祇奉恩榮心魂若厲幸甚幸甚某聞洪鍾在聽不足論擊缶之音太牢斯烹安可薦羹藜之味然則文章薄技固棄於高賢刀筆小能不容於先達豈非大人君子以為道德之薄哉某猥以

二字集
作實

鄙能未窺作者斐然狂簡雖有勞人之歌悵爾

詠懷曾無阮籍之思徒恨跡荒淫麗名陷俳優長為童

子之羣無望壯夫之列豈圖曲蒙勞獎躬奉德音以小
人之淺才承令君之嘉惠豈不幸甚豈不幸甚伏惟君

侯星雲提

集作
誕

秀金玉

集作
火

間成衣冠禮樂範儀朝野

致明君於堯舜皇極允諧當重寄於周

集作
阿

衡中階叶

秦非夫聰明博達體變知機如其仁如其仁方當拔俊

賞竒使拾遺補闕坐開黃閣高視赤松然後與稷契夔

龍比功論德豈徒蕭曹魏邴屑區區而已哉其實細

人過蒙大

集作
知

遇顧循微薄何敢祇承謹當畢力竭誠

策駑磨鈍期効忠以報德奉知己以周旋文章小能何足觀者不任感荷之至

上恩光曲歌詞啟

許敬宗

某啟少傅玄齡奉宣令旨垂使撰恩光曲詞六言四章章八韻謹率愚管宣述睿懷自惟淺陋深懼不允

一作允懼

不合竊尋樂府雅歌多皆不用六字近代有三臺傾盃樂等艷曲之例始用六言今故雜以號字稍欲存於古體起草適畢未敢為定蒙假不獲面啟對封藁本上呈可

不知宜伏聽後命謹啟

上武侍極啟二首

王勃

某啟某聞玄螭掩耀光銷

一作生

赤堇之芒白鶴催輝影

滅青胡之寶由是紫氛霄耿指牛漢而忘歸丹水神迷

道

一作蹈

驪泉而罔悔其有龍文已遠輕圖刺兕之功魚

目濫持自疑靈蛇之色循榮覽分朝聞夕可君侯締華
樹閣席寵芝局粲貂冕於金軒藻龜章於玉署月開鸞
鏡懷精鑑以分形霜湛虬鍾蘊希聲而待物吞九溟於

筆海若控牛涔抗五岳於詞峯如臨蟻垤馳魂霧谷忻
逢紫岫之英驛思霞丘佇接青田之響某北巖曲藝東
舉下節攀翰苑而思齊儔文風而立至迹疲千里未陪
丹轂之遊葉契三英尚隔黃衣之夢謹憑洪貸輒錄舊
文輕敢上呈列之如右涓波有託望日谷以馳誠鍾鼓
無施伏雷門而假息謹啟

二

某啟一昨不緣媒紹輕承盼飾祇寵相驚俯仰無地何

則循方極弊尚虧風雨之間撫翼濡鱗猶失江湖之上
况乎九天鵬術一代龍門榮枯舛致山川在目而可以
追騰白日志言於咫尺之書干突青雲投跡於尋常之
境徒以北林增秀弱翰知歸東壑流謙纖緒未已神交
道合君侯昭片善之榮千載一時下走得長鳴之所是
用謬憑高獎曲撰蕪音游海無際過雷自礮雖黃金激
憤指秦路而方窮蒼壁慙恩伏焦原而未遠謹啟

上李常伯啟

某啟某聞杞林騰秀羽族知歸暘谷流謙波臣有託然
則朝光八聖尚欣牧豎之詞道濟五殘未隔與人之誦
謹憑斯義輒呈宸遊東岳頌一首當仁不讓下走無慙
於自媒聞善若驚明公豈難於知我龍門高遠眇黃道
而無階爵里既投叫丹閣而有地伏願暫停左右曲流
國士之恩廣進芻蕘俯息樵夫之議輕陳徑捷退用彷徨

上皇甫常伯啟二首

某啟一昨奉命令寫新對臺策及前後舊文謹憑國士

之恩敢進興人之頌竊以龍鑣就路駑駿相懸鵠鏡臨
春妍媼自遠亦有飛霜匝地蘭蕭銜共盡之悲烈火埋
岡玉石抱俱焚之慘然則知音罕嗣流水空存至寶不
同荆山有淚君侯飾揚芻議提獎蕪詞白圭成再見之
榮黃金定一言之重鵬鷗既接仰雲逕而將趨龍阪可
登指星臺而有望循襟佩德撫事知恩山岳有輕河漢
無極謹啟

二

某啟自恭陳薄伎祇奉話言咳唾成恩盼昧為飾征夫
擊節方思孤竹之風壯士寒心實有長楊之作謹憑嚴
命輕呈乾元殿頌一首將冀導江至海常以筆札見知
南館西園遂與簪纓為伍德雖無盡攀驥尾而方遙生
也有涯比鴻毛而非重謹啟

上吏部裴侍郎啟

某啟猥承衡鏡驟照堦墀本慙刀筆之工虛荷雕蟲之
睠殊恩屢及嚴命頻加責光耀於昏冥課官商於寂寞

進退惟谷憂喜聚門誠恐下官冒輕進之譏使君侯招
過聽之議貴賤交失恩愛兩虧所以戰懼盈旬遲迴改
朔懷鄭璞而增愧捧燕珉而自耻某性惟懵昧識謝沉
寔蒙父兄訓導之恩藉朋友琢磨之義好學近乎智力
行近乎仁知忠孝為九德之源故造次必於是審名利
為五常之賊故顛沛而思遠雖未之逮也亦有其志焉
孔子曰言及之而不言謂之隱今者接君侯者三矣承
招延者再矣抑亦可以言乎夫文章之道自古稱難聖

人以開物成務君子以立言見志遺雅背訓孟子不為
勸百諷一揚雄所耻苟非可以甄明大義矯正末流俗
化資以興衰家國由其輕重古人未嘗留心也自微言
既絕斯文不振屈宋尊澆源於前枚馬張淫風於後談
人主者以宮室苑囿為雄敘名流者以沉酗驕奢為達
故魏文用之而中國衰宋武貴之而江東亂雖沈謝爭
騫適足兆齊梁之危徐庾並馳不能已周陳之禍於是
識其道者卷舌而不言明其弊者拂衣而徑逝潛夫昌

言之論作之而有逆於時周

一作姬

公孔氏之教存之而

不行於代天下之文靡不

一作道大

壞矣國家應千載之期

恢百王之業天地靜默陰陽順序方欲激揚正道大庇

生人黜非聖之書除不稽之論牧童頓顙思進皇謀樵

夫拭目願談王道崇大厦者非一木之材匡弊俗者非

一日之衛衆持則力盡真長則偽銷自然之數也君侯

受朝廷之寄掌鎔範之權至於舞詠澆淳好尚邪正宜

深以為者也伏見銓擢之次每以詩賦為先誠恐君侯

器人於翰墨之間求材於簡牘之際果未足以採取英
秀斟酌高賢者也徒使駿骨長朽真龍不降銜才飾智
者奔馳於末流懷真蘊璞者栖遑於下列易不云乎言
行君子之所以動天地失之毫釐差以千里書不云乎
弊化奢麗萬世同流餘風未殄公其念哉嗟呼蓋有識
天人之幽致明國家之大體辯焉而不窮酌焉而不竭
抱膝無悶盱衡自得彼悠悠之一作技焉足為君侯道
矣自非奉閑宴接清談未可一二言也然竊不自揆嘗

著文矣非敢自媒聊以恭命謹錄古君臣讚十篇并序
雖不足塵高識之門亦可以見小人之志也伏願暫停
左右少察胷襟觀述作之所存知用心之有地謹啟

文苑英華卷六百五十六